

1. juni 2011 aallarnerfigalugu tupat puuni tamani pinngitsoorani mianersoqqussutinik assitalersuisoqartalernissaa suliareqqullugu Naalakkersuisut peqquneqarnissaannik aalajangiiffigisassatut siunnersuut

(Inatsisartunut ilaasortaq Malik Berthelsen, Siumut)

Akissuteqaat

(Peqqissutsimut Naalakkersuisoq, Agathe Fontain)

Aappassaaneerneqarnera

Pujortartarnermut tunngasut pillugit aammalu pitsaaliutaasinnaasunik iliuseqarsinnaanernut illuatungiliuttut soqutiginninnerat Naalakkersuisut iluarisimaarpaat.

Naalakkersuisulli siunnersuut suli tapersersorsinnaangilaat. Tamatumunnga tunngaviuvoq iliussissanik aallarniisoqareersimammat, soorlu ilaatigut suliaritittussanik pujortarunnaarnissamut pikkorissartitsinikkut, pujortarunnaarnissamut ilitsersuisussanik pikkorissartitsinerit neqeroorutigisarnerisigut maannalu aamma pujortarnermik inerteqquteqarneq pillugu sukannernerusumik inatsisiliornikkut.

Qulaani pineqartut qanoq sunniuteqarnissaat Naalakkersuisut utaqeqqaarumavaat nutaanik iliuseqartoqarnissaata isummerfiginnginnerani.

Illuatungiliuttut annilaarsaaraluni sunniiniartarnerit innersuussutigisimavaat, uppenarsaatissaqanngilarli annilaarsaarinerit sunniuteqartarnerisut. Kigutitut tunngatillugu innersuussineq eqqaassagaanni Naalakkersuisut isumaqanngillat pineqartut taakku marluk imminnut assersuunneqarsinnaasut, tamatumani sunniiniarnermi aallaaviummat meeqqat qaqqorinnik kiguteqarnissaminnik takorluuinerat aammalu tamanna perorsaanikkut malitseqartinneqarmat, tamannalu tupat puuni assiliartalersuinikkut mianersoqqusinermi atuunnaviannigilaq.

Siunnersuutip itigartitsissutigineqarnissaa Naalakkersuisut aammaarlutik inassutigissavaat.